



Broj: 03-1-02-1-314-2/19 BA  
Datum: 25.3.2019. godine

**Samostalni sindikat osnovnog obrazovanja i odgoja FBiH**  
**Kantonalni odbor Kantona Sarajevo**  
**Alipašina br. 9/III**  
**71 000 Sarajevo**

**Predmet:** Davanje podataka o zaposlenim licima Uredu za borbu protiv korupcije i upravljanje kvalitetom Kantona Sarajevo, Mišljenje, *dostavlja se* –

**Veza:** Vaš akt broj: 597/19 od 19.3.2019. godine

Agencija za zaštitu ličnih podataka u Bosni i Hercegovini je zaprimila vaš akt broj i datum Veze, kojim tražite mišljenje u vezi postupanja po Odluci o Registru zaposlenih u javnom sektoru na području Kantona Sarajevo („Službene novine KS“ br. 9/19) i dostavljanja podataka zaposlenih u djelatnosti osnovnog obrazovanja i odgoja na području Kantona Sarajevo, Uredu za borbu protiv korupcije i upravljanje kvalitetom Kantona Sarajevo, a u svrhu unosa istih u Registar.

U vezi s naprijed navedenim, a na osnovu člana 40. stav (2) tačka g) Zakona o zaštiti ličnih podataka („Službeni glasnik BiH“, br. 49/06, 76/11 i 89/11), Agencija daje sljedeće:

### **MIŠLJENJE**

Zakon o zaštiti ličnih podataka je donesen u cilju zaštite ljudskih prava i osnovnih sloboda svih lica na teritoriji Bosne i Hercegovine, naročito prava na privatnost i zaštitu podataka u pogledu obrade ličnih podataka koji se na njih odnose.

Zakon u članu 17. reguliše pitanje davanja ličnih podataka trećoj strani. U skladu sa odredbama ovog člana, kontrolor može dati lične podatke trećoj strani ukoliko ista ima pravni osnov da dobije i dalje obrađuje lične podatke koje traži. Pravni osnov za davanje ličnih podataka može biti, prije svega utvrđen javni interes, a potom zakonom utvrđena nadležnost ili zakonit interes treće strane, te saglasnost nosioca ličnih podataka. Propisani pravni osnovi nisu postavljeni kumulativno, što znači da je dovoljno postojanje jednog od tih osnova za davanje ličnih podataka trećoj strani. Saglasnost nositelja ličnih podataka nije potrebna ukoliko je ispunjen neki od uslova iz člana 6. Zakona.

Odlukom o registru zaposlenih u javnom sektoru na području Kantona Sarajevo je propisana uspostava Registra zaposlenih u javnom sektoru, čija je svrha uspostava transparentnog, centralizovanog, kvalitetnog i učinkovitog sistema upravljanja ljudskim potencijalima u javnoj službi Kantona Sarajevo. Ovom Odlukom je propisana obaveza svim organima uprave i institucijama iz člana 2. Odluke, da imenuju ovlaštene i odgovorne osobe za unos podataka zaposlenih u Registar. Vrste podataka koje treba unijeti u Registar za svakog zaposlenog su

taksativno propisani u članu 5. Odluke, a isti se odnose na činjenice u vezi posla na koji je raspoređen, i to radno mjesto, kvalifikacije za obavljanje poslova na koje su raspoređeni, period zaposlenja u javnom sektoru, kao i osnovna plata koju prima iz budžetskih sredstava.

Bez obzira na Odluku, navedeni obim i vrste podataka, po svom karakteru ne predstavljaju podatke koji trebaju biti sakriveni od javnosti, osim za radna mjesta koja po prirodi posla zahtijevaju tajnost takvih podataka u cilju zaštite integriteta posla i života izvršioca, kao što je na primjer radno mjesto u vezi istrage krivičnih djela i slično. Institucije, organi, ustanove, preduzeća i drugi subjekti javnog sektora, osnovani su u javnom interesu i njihov rad se zasniva na principu transparentnosti. U tom smislu, određene pojedinosti o zaposlenim u javnom sektoru, podliježu većoj kontroli javnosti i isti ne mogu uživati zaštitu prava na privatnost u istoj mjeri kao zaposleni u privatnom sektoru.

Objavljivanje podataka o zaposlenim u javnom sektoru je od uticaja na privatni život tih lica. Međutim, pored uticaja na privatni život, evidentno je postojanje javnog interesa za to ko obavlja poslove u subjektima javnog sektora osnovanim upravo u javnom interesu. Iako zaposlenici mogu imati štetne posljedice zbog davanja njihovih podataka, iste ne mogu nadjačati javni interes u pogledu ostvarivanja principa transparentnosti rada subjekata javnog sektora kada je u pitanju zapošljavanje. Samim tim, saglasnost zaposlenih za objavljivanje podataka u vezi posla koji obavljaju je irelevantna.

Dakle, dostavljanje podataka o zaposlenim u Registar zaposlenih u javnom sektoru u skladu sa Odlukom o registru zaposlenih u javnom sektoru na području Kantona Sarajevo nije u suprotnosti sa Zakonom.

Informacije radi, Agencija je objavila ime i prezime zaposlenih u Agenciji, sa nazivom radnog mjesta i kontakt telefon, na službenoj web stranici <http://azlp.ba/>.



**DIREKTOR**

*Petar Kovačević*

**Dostaviti:**

- Naslovu
- Spis predmeta